

**Tii te Paulo**  
**nge céii**  
**Filémon**  
**Atabuhi ko a tii**

*Woo na e tii a tii ce?*

Wo Paulo, pa apostolo. Ke e mu pelen wo Timoté.

*E tii éniile?*

Ha awieme a jo 60 me 62, ha a bécéiuhe bwo mu he karépu te Paulo ne Rome (*Apostolo 28.30–31*). Ha a benaamwon naa, ke e tii ni tii na paa: a tii ce, nge céii Filémon; ke ni bée tii mwo nge céii lépwo Éfeso, ke lépwo Filipi me lépwo Kolosé.

*E tii me dee?*

Te pa céiu acéihi na a niin pie Filémon ne ha a pwomwo ubwo Kolosé. Pa bée Paulo ko penem (1.1), ke pa apulie na pwo naamuun, be pwo ni apenem tice ja kon den.

*É ko ade na e tii?*

Wo Onésime, pa apenem tice ja kon (*esclave*) de Filémon, ke e bune ni mwani ten, ke e cela. Ke e tehene nge ha a pwomwo ubwo Rome, ke pitapitilu me Paulo nelang. Ke é mu ko a pwooti te Paulo, ke e céihi ne ko Iésu wo Onésime. Ke wo Paulo, ke e neeng ngemwo pele Filémon. Ke e pwotii nge céiieng, beme e hegi mwo Onésime, pwohewii pa acéihi béén ne ko Iésu.

*Ade ace âne a tii ce?*

Ha a benaamwon na lé pihuô hen wo lépwo Roma, ke hiwon ni apulie na pwo ni apenem tice ja kon delé. É ne he ni bwo niimihi nen de ni apulie na hiwon jélé, ke piticenaado ne ko ni apenem tice ja kon delé. Kehe icehi ana e habwii wo Paulo pie, genye nemwo niimihi anaa, wogenye lépwo acéihi ne ko Iésu. Be e pii te Filémon pie, wo Onésime, ke caa time uce pa apenem tice ja kon den cehi. Kehe caa pa acéihi béén ne ko Padaame. Ke wâé heme e hegieng wo Filémon, ha a pipwoééhe (1.16), ke me e pineuhi ni ta na e pwo.

E temehi wo Paulo pie, e okéé wo Filémon, ko a ta na e pwo ten wo Onésime, ke é nelang he na genye alihi pie, e paciheeng me bwala, ne ha a pipwoééhe.

É ne ha a tii ce, ke genye alihi mwo a ocine ne ko a bwopwonen de Kériso tenye ni apulie na nye pwo nina ta. Be e pineukenye, ke e hegikenye. Ke e pii pie, wogenye lépwo béén. Ke pwohewii ana e pwo me de Onésime wo Paulo (1.18–19), ke e pwocuhi ati ni kérédi tenye wo Kériso, ko a bwo mele ten me denye.

### **A bwomune a tii te Filémon**

Pipwobwocu (1.1–3)

A pipwoééhe me a céihi te Filémon (1.4–7)

Go hegi mwo Onésime (1.8–21)

Bépinelé (1.22–25)

*Pipwobwocu*

<sup>1</sup> Woéo\* Paulo na é pwotii lé céiiko, go Filémon, pa bééng ko a penem, na te nihe eânimung dem. É ko mu he karépu, mu ko ni penem dong me de \*Kériso Iésu. Ke [e ne bwocu tem mwo] wo Timoté, pa céiu acéihi béényu.

<sup>2</sup> Ke [go ne a bwocu temu] te Apia, ê céiu béényu, ke wo Arkipe, pa béényu ko pwopa [me de Padaame henye Iésu Kériso]. Ke [go pwobwocu mwo] te ni béé acéihi, na lé pineibulé ne he pomwa tem.

<sup>3</sup> Wâé heme etewé a \*pipwoééhe tice ja kon me a péém na e âbé mu ko Padué Caa tenye me Padaame henye Iésu Kériso. Adéiko!

### *A pipwoééhe me a céihi te Filémon*

<sup>4</sup> Tee ati he ni benaamwon na é mu pwoiitihî hen, ke é pwo-olé te Padué kom.

<sup>5</sup> Be é téne ni jepule ko a céihi tem ne ko Padaame Iésu, me a bwo pipwoééhe tem ne ko ati ni acéihi.

<sup>6</sup> É ilehi koja Padué pie, wâé heme te nihe ubwo da a pipwoééhe tem ne ko lépwo béém acéihî†. Ke ni apulie‡, ke lé o alihi ehi ati ni pétaapwo naado na wâé, na e konye, mu ko Kériso.

<sup>7</sup> Te nihe pipwodéén a pwonimung, go pa ju bééng, ko a pipwoééhe tem. Be go pwopweehi ni pwonime ni apulie te Padué, ke anaa kuti ana e pamwoiuéó.

---

\* **1:1 1.1** Woéo—Grek: *Wogemu*. Wo Paulo na e pwotii, kehe icehi ana e habwii pie, céiu pwonimelu me Timoté na e mu pelen. **1:2 1.2** Kolosé 4.17; 2 Timoté 2.3 † **1:6 1.6** *A pipwoééhe tem ne ko lépwo béém acéihî*—Grek: *A pimu ibu ne ha a céihi, ai A bwo pipatemehi na a céihi.* ‡ **1:6 1.6** *Ni apulie*—ai Go. **1:7 1.7** 2 Korénit 7.4

### *Go hegi mwo Onésime*

<sup>8</sup> [É mu ko a pipwoééhe tem] ke time é uce pimwiéó, me é ilehi kojako [pie, me go hegi ehi pa ju bééng§]. Te jan ne kong me é pihuôhi ne tem anaa, ne he nii Kériso.

<sup>9</sup> Kehe icehi ana é te ju ilehi kojako, be te nihe eânimung dem, woéó Paulo, na caa pa apulie pwonimung\*, ke é ko mu he karépu, [mu ko ni penem dong] me de Kériso Iésu.

<sup>10</sup> Weengi ana é ilehi kojako: Me go hegi mwo pa \*apenem tice ja kon dem [li e cela kom]: wo Onésime. Be [caa pa acéihi] he é mu éni he karépu. Ke caa pa naîng ne ha a céihi.

<sup>11</sup> [A nii *Onésime*, ke a bwopiinen pie ‘pa apicani tenye’.] Ke é hemepie time e uce picani tem ânebun, kehe é jenea ni, ke e te nihe picani tenyu.

### *É neeng mwo lé céiiko*

<sup>12-13</sup> Be pana te junihe e ha a pwonimung. Ke te nihe nimung me é te imwieng ne éni pelong, ha a benaamwon ce, beme e mwo picani tong, he mwo ko tieko. Be é mwo mu he karépu mu ko [a bwo patemehi nen dong] a \*Pwooti Wâé te Iésu Kériso. Kehe icehi ana é o neeng mwo lé céiiko,

<sup>14</sup> hemepie nimem. Kehe time é o uce wonaa hemepie te muhi tem. Be wâé heme go hegieng† ha a ju pwonimem, kehe me time uce é mu ko a bwo huôhi ne tem dong.

---

§ **1:8 1.8** *Me go hegi ehi pa ju bééng*—Ni pwooti na e mu ha a niide a tii 17. \* **1:9 1.9** *Woéo...na caa pa apulie pwonimung*—ai *Woéó pa apulie na e pahedeéó ngen wo Kériso.* **1:10 1.10** 1 Korénit 4.15; Kolosé 4.9 † **1:14 1.14** *Go hegieng*—Grek: *A naado na wâé na go pwo.*

15 A juuju pie, pwo a céiu benaamwon na time geu uce pimu ibu hen. Wieli me wonaa, beme geu bo pimu ibu mwo dieli mwo.

16 Be é jena ni, ke caa time uce pa apenem dem cehi, kehe caa pa âjiényu mwo ne he nii Kériso. Caa pa ju bééng, ke wogo, ke wâé heme go te nihe piwâéng. Be pa apenem dem, ke a céiu mwo, ke caa pa acéihi béém ne ko Padaame.

*Go hegieng pwohewii ne kong*

17 Heme pie junaado ne tem pie wogenyu lupwo béén [ne he nii Kériso] ke go hegieng mwo, pwohewiin heme woéo.

18 Ke mepie e bune ace céiu naado kojako‡, ke mepie e pwo ace naado celi time uce wâé, ke go ne he niing ati.

19 Woéo na é tii ni atii ce, ko a ing: *Woéo Paulo, na é bo pwocuhin ne tem.* Kehe icehi ana wogo mwo, go pa bééng, ke wâé heme go niimihi§ pie, é mu kong li go hegi \*a ju mulip.

20 É mu ko anaa, ke é ilehi kojako go Filémon pie, go pwo ana é pii, ne he nii Padaame, beme o wâé a pwonimung, be wogenyu lupwo acéihi ne ko Kériso\*.

21 É caa céihi ne ko a bwo piténédehi tem. Ke anaa é pwotii lé, be é temehi pie, go o bo pwo celi nihe piubwo koja nina é ko pii lé.

*Bépinelé*

---

**1:16 1.16** 1 Timoté 6.2 ‡ **1:18 1.18** *Mepie e bune ace céiu naado kojako*—Grek: *Mepie pwo kérédi ten ne pelem.* § **1:19 1.19** *Wâé heme go niimihi*—Grek: *Time é o uce pii tem.* \* **1:20 1.20** *Be wogenyu lupwo acéihi ne ko Kériso*—ai *Ne he nii Kériso.*

<sup>22</sup> É niimihi pie [wo Padué, ke e] o caa ne me é âdé caniêkewé ati, wonaa mu ko ni pwopwoiitihi tewé. Ke go pwopweehi ace nemwa celi me é mu hen.

<sup>23</sup> E pwobwocu tem wo Épafra, pa bééng ko a mu éni he karépu, mu ko [a bwo patemehi nen den] Kériso Iésu.

<sup>24</sup> Ke lé pwobwocu tem mwo wo Maréko, me Aristarke, me Démas, me Luka, lépwo bééng ko a penem.

<sup>25</sup> Wâé heme tai e pelewé ati, a pipwoééhe tice ja kon de Padaame henye Iésu Kériso!

Adéikewé!

**Tii Iitihi: Élele Iitihi na mwo Coho  
Cemuhî: Tii Iitihi: Élele Iitihi na mwo Coho (New  
Testament)  
Nouveau Testament Cemuhî**

copyright © 2017-2018 Wycliffe Bible Translators, Inc.

Language: Cemuhî

Contributor: Wycliffe Bible Translators, Inc.

Nouveau Testament en cemuhi

All rights reserved.

2025-04-30

---

PDF generated using Haiola and XeLaTeX on 29 Apr 2025 from source files  
dated 30 Apr 2025

f8ee0ae8-19d4-5493-b0f2-3132fc194785